



REPUBLIKA E SHQIPËRISË

KUVENDI

Komisioni për Ekonominë dhe Financat

Tiranë, më 18.09.2018

Dokument parlamentar

(Komisioni përgjegjës)

R A P O R T

Mbi

Projektligjin “Për ratifikimin e marrëveshjes së zbatimit, ndërmjet Republikës së Shqipërisë, të përfaqësuar nga Ministria e Financave dhe Ekonomisë, dhe Agjencisë Gjermane për Bashkëpunim Ndërkombëtar (GIZ), për projektin “Këshillimi për migracionin në Shqipëri”

I. Hyrje

Komisioni për Ekonominë dhe Financat, në mbledhjen e datës 18.09.2018, mori në shqyrtim projektligjin “Për ratifikimin e marrëveshjes së zbatimit, ndërmjet Republikës së Shqipërisë, të përfaqësuar nga Ministria e Financave dhe Ekonomisë, dhe Agjencisë Gjermane për Bashkëpunim Ndërkombëtar (GIZ), për projektin “Këshillimi për migracionin në Shqipëri”, në cilësinë e komisionit përgjegjës, bazuar në nenet 32-38 të Rregullores së Kuvendit.

Për shqyrtimin e këtij projektligji u caktua relator Znj. Evis Kushi.

Për të mbrojtur projektligjin në emër të Qeverisë, ishin prezent përfaqësues nga Ministria e Financave dhe Ekonomisë.

II. Shqyrtimi i projektligjit në komision.

Projektligji është propozuar nga Këshilli i Ministrave në përputhje me nenet 78, 83 pika 1 dhe 121 pika 1, të Kushtetutës së Republikës së Shqipërisë, nenit 68, të Rregullores së Kuvendit si dhe vjen

në përmbushje të kërkesave të nenit 17, të ligjit nr.43/2016, “Për marrëveshjet ndërkombëtare në Republikën e Shqipërisë”.

Relatori i Komisionit, në fjalën e tij, shpjegoi se, marrëveshja është miratuar në parim me vendimin e Këshilli të Ministrave nr. 85, datë 14.02.2018 dhe është nënshkruar prej palëve.

Kjo marrëveshje bazohet dhe është në vijim të marrëveshjeve “Për bashkëpunim teknik” (21 tetor 1988) dhe “Për punësimin e punëtorëve për zgjerimin e njohurive të tyre profesionale dhe gjuhësore (10 dhjetor 1991), ndërmjet Republikës së Shqipërisë dhe qeverisë së Republikës Federale të Gjermanisë

Projektligji ka për qëllim ratifikimin e kësaj marrëveshje e cila ka për objektiv forcimin e kontributeve të migrantëve për zhvillimin e vendeve të tyre të origjinës, përmirësimin e kushteve kuadër për migracionin e ligjshëm, luftimin e migracionit të parregullt përmes ofrimit të informacionit të nevojshëm për rrugët ligjore të migracionit të punës, rritjen e informimit lidhur me arsimin dhe formimin profesional e perspektivat e tregut të punës, si në Gjermani, ashtu edhe në Shqipëri.

Këto objektiva do të ndiqen në mënyrë aktive në 5 fusha veprimtarie:

1. Këshillimin për politikën e migracionit, përmes një këshillimi të strukturuar politikash, që rrit koherencën politike, kapacitetin institucional për bashkëpunim si dhe dialogun.
2. Këshillimin për migracionin, rritja e mundësisë për marrjen e informacionit mbi rrugët ligjore të migracionit, për migrantët e mundshëm, informacionit mbi perspektivat e arsimimit dhe të punësimit në Shqipëri; informimit rreth migracionit të punës, mundësitë për hyrje në tregun gjerman të punës dhe trajnimet përkatëse për personelin e sporteleve të migracionit; gritjen e kapaciteteve të sporteleve ekzistuese, përmirësimin e bazës të të dhënave për aktorët në terren dhe situatën e grupeve të synuara.
3. Kthimi i migrantëve i orientuar nga zhvillimi duke mundësuar që migrantët e kthyer të kontribuojnë për zhvillimin e vendit të tyre përmes transferimit të njohurive.
4. Bashkëpunimi me diasporën.
5. Ide biznesi për zhvillim, përmes këshillimit efektiv të migrantëve për të zbatuar ide biznesi në vendin e origjinës.

Kontributi gjerman për projektin do të menaxhohet nëpërmjet Agjencisë Gjermane për Bashkëpunim Ndërkombëtar GIZ-it, dhe për këtë qëllim qeveria e Republikës Federale të Gjermanisë do t’i ofrojë GIZ-it deri në 1 500 000 (1 milion e pesëqind mijë) euro.

Përfaqësuesit e Ministrisë së Financave dhe Ekonomisë, shpjeguan se kontributi sipas kësaj marrëveshjeje është i ndarë në 4 elementë si poshtë:

- i. Sigurimi i ekspertëve;
- ii. Furnizimi me materiale dhe pajisje;
- iii. Kostot operative dhe administrative;
- iv. Kontribute të tjera.

Për elementin kostot operative dhe administrative, është përcaktuar edhe kontributi i Ministrisë së Financave dhe Ekonomisë (MFE) si struktura përgjegjëse për ndjekjen dhe zbatimin e marrëveshjes. Ky kontribut do të jetë në masën 45 000 euro në vit për vitet 2019 dhe 2020, shuma këto të planifikuar në projektbuxhetin afatmesëm 2019-2021 dhe rishikimin e buxhetit të vitit 2018 brenda tavaneve buxhetore të Ministrisë së Financave dhe Ekonomisë.

Në përfundim Komisioni për Ekonominë dhe Financat, duke vlerësuar se kjo marrëveshje do të mundësojë forcimin e kontributeve të migrantëve për zhvillimin e vendeve të tyre të origjinës, përmirësimin e kushteve për migracionin e ligjshëm, luftimin e migracionit të parregullt si dhe rritjen e informimit lidhur me arsimin dhe formimin profesional e perspektivat e tregut të punës, me votat pro të të gjithë të pranishmëve e miratoi projektligjin.

Relator

Evis Kushi

Kryetar

Erion BRAÇE